



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԵՐՔԻՆ ԳՈՐԾԵՐԻ  
ՆԱԽԱՐԱՐՈՒԹՅԱՆ ՈՍՏԻԿԱՆՈՒԹՅԱՆ  
ՊԱՐԵԿԱՅԻՆ ԾԱՌԱՅՈՒԹՅՈՒՆ**

0090, ք.Երևան, Շոպրոնի 77

N

21/3/933

< 20 10 > 2023թ.

**Արսեն Ճշմարիտյանին  
Հասցե՝ ք. Վանաձոր, Զաքարյան 4/1 Ա**

Ուղարկվում է Ձեր դիմումի հիման վրա ՀՀ ՆԳՆ ոստիկանության պարեկային ծառայության վարչական բոլորքների քննության բաժանմունքում իրականացված վարչական բողոքարկման վարույթի արդյունքում թիվ 8180219978 վարչական ակտն անփոփոխ, իսկ վարչական բողոքն առանց բավարարման թողնելու մասին որոշման օրինակը:

Առդիր՝ <<3>> թերթ:

**Պերի պարտականությունների  
ժամանակավոր կատարող,  
ոստիկանության գնդապետ՝**

**Ա. Մաթևոսյան**

Կապ. Ա. Նիկողոսյան

## Ո Ր Ո Շ ՈՒ Մ

ՀՀ ՆԳՆ ոստիկանության պարեկային ծառայության վարչական իրավախախտման վերաբերյալ գործով 06.09.2023թ.-ին կայացված թիվ 8180219978 որոշումն անփոփոխ, իսկ վարչական բողոքն առանց բավարարման թողնելու մասին

ք. Երևան

<< 18 >> 10 2023թ.

ՀՀ ՆԳՆ ոստիկանության պարեկային ծառայության պետի պարտականությունների ժամանակավոր կատարող, ոստիկանության գնդապետ՝ Ա. Մաթևոսյանս, վերանայելով 19.09.2023թ.-ին ՀՀ ՆԳՆ ոստիկանության պարեկային ծառայություն ստացված Արսեն Ճշմարիտյանի դիմումի հիման վրա հարուցված վարչական բողոքարկման վարույթի նյութերը,

## Պ Ա Ր Զ Ե Ց Ի

06.09.2023թ.-ին՝ ժամը 02:50-ին, Լոռու մարզի Վանաձոր քաղաքի Տիգրան Մեծ պողոտայում «Օպել» մակնիշի 37 RU 419 հաշվառման համարանիշի տրանսպորտային միջոցի վարորդ Արսեն Ճշմարիտյանը դիտավորյալ չի կատարել տրանսպորտային միջոցը կանգնեցնելու մասին ոստիկանության ծառայողի օրենքով սահմանված կարգով տրված պահանջը: ՀՀ ՆԳՆ ոստիկանության պարեկային ծառայության Լոռու մարզի գումարտակի 1-ին վաշտի 3-րդ դասակի կրտսեր պարեկ Հովիկ Զիլավյանի կողմից «Ճանապարհային երթևեկության անվտանգության ապահովման մասին» ՀՀ օրենքի 23-րդ հոդվածի 3-րդ մասի ներառվածություն և «Վարչական իրավախախտումների վերաբերյալ» ՀՀ օրենսգրքի 124-րդ հոդվածի 31-րդ մասի հատկանիշներով կայացվել է վարչական իրավախախտման գործով թիվ 8180219978 որոշումը՝ Ա. Ճշմարիտյանին զրկելով տրանսպորտային միջոցներ վարելու իրավունքից 1 տարի ժամկետով:

Դիմողը 19.09.2023թ.-ին ՀՀ ՆԳՆ ոստիկանության պարեկային ծառայություն ստացված դիմումով խնդրել է անվավեր ճանաչել ՀՀ ՆԳՆ ոստիկանության պարեկային ծառայության վարչական իրավախախտման վերաբերյալ գործով 06.09.2023թ.-ին կայացված թիվ 8180219978 որոշումը՝ մասնավորապես նշելով, որ վարչական իրավախախտման գործով թիվ 8180219978 որոշումը կայացնելու համար հիմք հանդիսացած այն հանգամանքը, որ ինքը 2023 թվականի սեպտեմբերի 6-ին դիտավորյալ չի կատարել իր վարած տրանսպորտային միջոցը կանգնեցնելու մասին ոստիկանության ծառայողի՝ օրենքով սահմանված կարգով տրված պահանջը, իրականությանը չի համապատասխանում:

«Վարչարարության հիմունքների և վարչական վարույթի մասին» ՀՀ օրենքի 30-րդ հոդվածի 1-ին մասի «ա» կետի հիմքով ՀՀ ՆԳՆ ոստիկանության պարեկային ծառայության վարչական բողոքների քննության բաժանմունքում հարուցվել է վարչական բողոքարկման վարույթ:

«Վարչարարության հիմունքների և վարչական վարույթի մասին» ՀՀ օրենքի 38-րդ հոդվածով սահմանված կարգով վարչական վարույթում քննարկվող փաստական հանգամանքների վերաբերյալ արտահայտվելու և լսված լինելու հնարավորություն տալու նպատակով դիմողը հրավիրվել է պարեկային ծառայության վարչական բողոքների քննության բաժանմունք:

Դիմումի քննարկման արդյունքում ձեռք բերված ապացույցների և փաստական տվյալների համադրմամբ պարզվել է, որ վարչական իրավախախտման գործով 06.09.2023թ.-ին կայացված թիվ 8180219978 որոշումն ենթակա է կատարման հետևյալ պատճառաբանությամբ և հիմնավորմամբ:

ՀՀ ՆԳՆ ոստիկանության պարեկային ծառայության ծառայող Հովիկ Զիլավյանի պարզաբանման համաձայն՝ 06.09.2023թ.-ին, ժամը 02:50-ի սահմաններում Լոռու մարզի Վանաձոր քաղաքի Տիգրան Մեծ պողոտայում ծառայություն իրականացնելիս նկատել է հանդիպակաց երթևեկության գոտիով ընթացող «Օպել» մակնիշի 37 RU 419 հաշվառման համարանիշի տրանսպորտային միջոցը: Հետադարձ է կատարել և իրեն հատկացված ծառայողական ավտոմեքենայով ազդանշան տալով և բարձրախոսով հաղորդելով փորձել է կանգնեցնել նշված տրանսպորտային միջոցը՝ առջևի հողմապակին թաղանթապատված վիճակում վարելու կասկածանքով, սակայն վարորդը դիտավորյալ չի ենթարկվել իր՝ օրենքով սահմանված կարգով տրված՝ տրանսպորտային միջոցը կանգնեցնելու պահանջին: Տիգրան Մեծ պողոտայից մինչև Մյասնիկյան փողոց վարորդը շարունակել է նույն վարքագիծը, այդ ամբողջ ընթացքում ծառայողական ավտոմեքենայի կարմիր և կապույտ առկայծող փարոսիկները, ինչպես նաև հատուկ ծայնային ազդանշանները եղել են միացված և բարձրախոսի միջոցով անընդհատ հայտարարել է տրանսպորտային միջոցի մակնիշը և համարանիշը, սակայն ամբողջ ընթացքում վարորդը դիտավորյալ չի ենթարկվել կանգ հրահանգին, ընդհակառակը՝ շարունակելով երթևեկությունը՝ ավելացրել է տրանսպորտային միջոցի արագությունը և կանգնել է միայն չհասած Տիգրան Մեծ պողոտա-Մյասնիկյան փողոցի խաչմերուկ: Կանգնելուց հետո կանգ պահանջին չենթարկվելու փաստի առթիվ դիմողը պատճառաբանել է, որ զայրացած է եղել պարեկային մեկ այլ ծառայողի կողմից վարչական իրավախախտումների վերաբերյալ իր նկատմամբ կայացված որոշումների հետևանքով և դա է եղել իր կողմից կանգ ազդանշանին չենթարկվելու պատճառը: Նշված իրավախախտման համար կազմել է արձանագրություն և կայացրել որոշում՝ վարորդ Ա. Ճճմարիտյանին զրկելով տրանսպորտային միջոցներ վարելու իրավունքից 1 տարի ժամկետով:

«Ոստիկանության մասին» ՀՀ օրենքի 38-րդ հոդվածի համաձայն՝ ոստիկանության ծառայողի օրինական պահանջների կատարումը պարտադիր է բոլոր քաղաքացիների և պաշտոնատար անձանց համար: Դրանք չկատարելը կամ ոստիկանության ծառայողի պարտականությունների կատարմանը խոչընդոտող գործողություններն առաջացնում են պատասխանատվություն՝ օրենքով սահմանված կարգով:

«Ճանապարհային երթևեկության անվտանգության ապահովման մասին» ՀՀ օրենքի 23-րդ հոդվածի 3-րդ մասի համաձայն՝ ճանապարհային երթևեկության մասնակիցը պարտավոր է պահպանել Հայաստանի Հանրապետության կառավարության հաստատած ճանապարհային երթևեկության կանոնները, ինչպես նաև ոստիկանության ծառայողների ու երթևեկության կարգավորման համար լիազորված այլ անձանց օրինական պահանջներն ու իր գործողություններով չստեղծել վթարային իրադրություն:

«Վարչական իրավախախտումների վերաբերյալ» ՀՀ օրենսգրքի 124-րդ հոդվածի 31-րդ մասի համաձայն՝ տրանսպորտային միջոցը կանգնեցնելու մասին ոստիկանության ծառայողի՝ օրենքով սահմանված կարգով տրված պահանջը վարորդների կողմից դիտավորյալ չկատարելը, առաջացնում է տրանսպորտային միջոցներ վարելու իրավունքից զրկում՝ մեկ տարի ժամկետով, իսկ տրանսպորտային միջոցներ վարելու իրավունք չունեցող անձի նկատմամբ՝ տուգանքի նշանակում՝ սահմանված նվազագույն աշխատավարձի երկուհարյուրապատիկի չափով:

«Վարչական իրավախախտումների վերաբերյալ» ՀՀ օրենսգրքի 251-րդ հոդվածի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ:

«Վարչական իրավախախտումների վերաբերյալ» ՀՀ օրենսգրքի 252-րդ հոդվածի համաձայն՝ մարմինը (պաշտոնատար անձը) ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքներ

համակողմանի, լրիվ և օբյեկտիվ հետազոտման վրա, ղեկավարվելով օրենքով և սոցիալիստական իրավագիտակցությամբ:

Այսպիսով, ելնելով վերոգրյալից և ղեկավարվելով «Վարչական իրավախախտումների վերաբերյալ» ՀՀ օրենսգրքի 293-րդ հոդվածի 1-ին մասի 1-ին կետով՝

### **Ո Ր Ո Շ Ե Ց Ի**

1. ՀՀ ՆԳՆ ոստիկանության պարեկային ծառայության վարչական իրավախախտումների վերաբերյալ գործերով 06.09.2023թ.-ին կայացված թիվ 8180219978 որոշումը թողնել անփոփոխ, իսկ վարչական բողոքն առանց բավարարման:

2. Սույն որոշման օրինակն ուղարկել դիմողին և ՀՀ ՆԳՆ ոստիկանության պարեկային ծառայության Լոռու մարզի գումարտակ:

3. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան՝ «Վարչական դատավարության» ՀՀ օրենսգրքի 72-րդ հոդվածով սահմանված ժամկետներում:

**Պետի պարտականությունների  
ժամանակավոր կատարող,  
ոստիկանության գնդապետ՝**



**Ա. Մաթևոսյան**